

寶晉英光集



2011.58

寶
晉
英
光
集

米芾著

中
華
書
局

叢書集成初編

寶晉英光集

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一
統一書號：七〇一八·一五

寶晉英光集序

予仕居潤餘十年。曾羽書交馳。凡訪古聽奇。皆日力所不暇。僅能考海岳一遺址。塹樺爲園。薦菊爲祠。倚江爲堂。礬石爲刻。時一至其間。徙倚縱目。慨想摩挲而已。夫自江而南。名城輿都。潤爲大。六朝而下。賢規雋轍。潤爲古。而又據景物之會。窮心目之趣。惟潤爲多人。或咎予謂歷數千百載。它豈無名人才士。可以表著。而獨惓惓於英光。余每應之曰。境無凡勝。以會心爲悅。人無今古。以遺蹟爲奇。若杖履無日涉之勞。江山有入境之助。風帆沙鳥。晨雨夜虹。凡是園之所包羅。衆目之所覩記者。莫不挾英秀。露光彩。雖微遺蹟。猶將強附而俎豆之。而況我宋人物。如南宮者耶。夫旣卜園觀。則不可以不祠。旣闡祠。則不可以不撫遺考。文翰以備一堂之缺。旣竣摹瑑之事。而擴放失。恪編次。爲是集以傳。又次敘之所當舉。而必不可無者也。則又奚疑。或者無以答。予按山林集。舊一百卷。今所會萃附益。未十之一。南渡而後。文獻不足。固無可議。若曰南宮被天監流榮名。其在兩朝。元不顯以結字思陵。翰墨志有曰。芾之詩文。語無蹈襲。出風煙之上。覺其詞翰間。有凌雲之氣。噫嘻。此漢武帝所以知相如也。冠于篇端。庶幾覽者有以自得焉。紹定壬辰歲上巳日。鄂國岳珂序。

1000-1008

寶晉英光集卷第一

襄陽 米芾 元章著

賦五首

參賦

武帝既祠太一。受釐頒胙。意得氣泰。神怡志豫。閱符合瑞。至于嚮暮。於是升通天之臺。攬沆寥之路。觀三星聯影。睨然當戶。顧侍臣曰。是何星也。侍臣枚臯進曰。參星也。帝曰。是何所主。對曰。是主民。帝曰。可得聞其說歟。臯曰。臣之淺學。俳僂優隊。捷語關言。奉歡承詬。稱道盛德。受賜甚大。臣不敢對。帝曰。先生無辭。臯乃跪而進曰。自周衰道喪。百里一王。嗜欲加僭。民財用傷。貪如碩鼠。墮號鵜梁。匪鳶匪鮪。或濟或翔。至于暴秦。襲冕而狼。趙郊坑肉。魏野封瘡。粵嶺山斷。遼海城長。驪丘墟地。阿房繡牆。則是星也。隨隨而無光。帝曰。亦嘗有明乎。曰。有。古有治君。曰堯與禹。敬時命官。以民爲主。民知樂生。鼓腹歌舞。次逮成湯。視民如傷。一夫不獲。如己納隍。周之文武。迄于成康。道德浹洽。禮義興行。刑措不用。至于百齡。則是星也。亦嘗煒煜而晶燦。帝曰。宜乎自此不復有光矣。曰。惟昔秦籙不究。上天悔亡。乃命高祖。匹夫奮張。一洗世亂。惠綏四方。化其姦宄。約以三章。及我文景。恭儉淳樸。隱卹賑周。德澤甚渥。太倉積紅腐之粟。司農朽不較之索。則

是星亦嘗煜煜而灼灼。今陛下承累世之休光。翕五福於仰戴。坐明堂神明之會。據建章珍陸之海。臣萬國朝四裔。名王係於祈連。宛馬來於天外。致赤鴈駸廐之異物。獲寶鼎芝房之珍怪。名在百王之上游。應並五帝之左界。而乃晡晡而無光。臣臯所以堙鬱而未快。遽巡而不對也。古訓有言曰。民猶水也。可以載舟。可以覆舟。言未及休。命蓋陳鈞。寢不得寐。三起問籌。翌旦坐明光殿。封富民侯。

壯觀賦

米元章登北山之字。徘徊四顧。慨然而歎曰。壯者江山之觀也。開闢亙古。逖哉邈矣。帝德所被。北幽南趾。王功未宣。六合阻異。明翳視其消長。來叛從而間起。去古無章。水濱莫委。比世可悼。晉裂漢臺。披秦荏莽。且代且盜。豈地具而天設。特資滄而附暴者乎。乃物偶然。而人乘以智巧爾。若夫真符秉中。萬派朝宗。稽顙納質。不黷兵鋒。版圖入而地合。氛祲明其大同。遠琛近賈。千里不風。鑑湛一色。折葦可通。其威弱吹砌。鱗疾颺湧山。九地出沒。千峯上攢。如嶺並亘。連雲俱還。長鯨齒巨。天吳腹斑。閨運未既。生民道艱。宜乎曹郎託詞。以按甲。悌鬱而永歎也。吾每登是字。攬是土。當日杲天清。嵐開練布。邀太平君子。引吳醇。舞越女。破千歲之長憂。擲森然之萬古。有杞初登。由儀再旅。至甚醉而乃去也。

登黃鶴臺下臨金山賦

余登黃鶴之高臺。臨紫金之奇岫。下風輪以槃根。中百川而露秀。抱羣山之勝勢。儼化城之寶構。二塔立而角具。五洲落而珠闌。幽怪集而洪鐘舉。杜侶萃而香積奏。泛海濤以出像。過龍宮而一嗅。水府明威以

謹法神龍降光於秘呪。航溟陽之津途。會四海之奔走。其或浮玉焦山之名掩霧。石簾落潮。倒洪流而夜
響。援淡墨其難描。靈鼉屹乎波起。天花雨而仙邀。有時江練夜白。秋清月高。冰壺無底。下徹秋毫。吾嘗中
瀾。弭楫寒露。泣袍追夸父以逐日。呼龍伯以連鰲。得長鯨而可跨。或拔劍以逐蛟。吾方老丹徒。此戲卒未
艾也。每回輿茲臺。招酒侶。命文豪。劇太平藻飾之談。以窮年而逍遙也。

天馬賦有序

高公繪君素家。有唐韓幹圖于闐所進黃馬一軸。馬翹舉雄傑。余感今無此馬。故作賦云。

方唐牧之至盛。有天骨之超俊。勒四十萬之數。而隨方以分色焉。此馬居其中以爲鎮。目星角而電發。蹶
踔蹄以風迅。鬣龍顙以孤起。耳鳳簪而雙峻。翠華建而出步。閭闔下而輕噴。低鶩羣而不嘶。橫秋風以獨
韻。若夫躍溪舒急。冒絮征叛。直突則建德項繫。橫馳則世充領斷。皆絕材以比德。敢伺蹶而致客。豈肯浪
逐苜蓿之坡。蓋當下視八坊之駿。高標雄跨。而獅子讓。逸氣下衰。而照夜矜。穩於是風靡格。顏色妙才
駘。入仗不動。終日如坏。乃得玉爲銜飾。繡作鞍。優聚秣粟。衆肉脹筋埋。其報德也。蓋不如偷盧啞盜。策蹇
勝柴。鑄黃鵠而吐水。畫白澤以除災。但覺馳垂就節。鼠伏防猜。怒雖甚厲。馴號斯諧。誓俛首以畢世。未伏
櫪以興懷。嗟乎。所謂英風頓盡。冗仗高排。若不市駿骨。致龍媒。如此馬者。一旦天子巡朔方。升喬岳。埽四
海之塵。校岐陽之獵。則飛黃驥。靈雲追電。何所從而遽來。何所從而遽來。

蓋賦新添。見英光堂帖。或云。非其所作。俟考。

里有織婦。著簪葛幘。顏色憔悴。喟然而讓於蠶曰。予工女也。惟化治絲枲。是司。惟服勤組紃。是力。世受蠶事。以蕃天財。爾之未生。我則浴而種。以俟化。爾之既育。我則飭其器。以祇事。爾食有節。我則採柔桑以薦焉。爾處不恩。我則偁溫室以養焉。爾惟有神。我則獨其祀。而未嘗瀆也。爾惟欲蠶。我則趣其時。而不敢慢也。爾欲顯素絲之潔。我則具綠盆澤器以奉之。爾欲布幅利之德。我則操鳴機密杼以成之。春夏之勤。則髮蓬不及膏。秋冬之織。則手胼無所代。予之於子。可謂殫其力矣。今天下文繡被牆宇。千卒歲無褐。提帛飾犬馬。予終身恤緯。寧我未究其術。將爾忘力於我耶。蠶應之曰。嘻。予雖微生。亦稟元氣。上符龍精。下同馬類。昔在上世。寢皮食肉。未知爲冠冕衣裳之等也。未知禦雪霜風雨之具也。當斯之時。余得與蠕動之儔。相忘於生生之域。蠢然無見象之樂。熙然無就烹之苦。自大道既隱。聖人成能。先蠶氏利我之生。蕃我以術。因絲以代蠶。因帛以易韋。幼者不寒。老者不病。自是民患弭。而余生殘矣。然自五帝以降。雖天子之后。不敢加尊於我。每歲命元日。親率嬪御。祀于北郊。築宮臨川。獻蠶成服。非天地宗廟。黼黻無所備。非禮樂車服。旂常無所設。非馭祀無副幣。非聘賢無束帛。至纖至悉。衣被萬物。女子無貴賤。皆盡心於蠶。是以四海之大。億民之衆。無游手而有餘帛矣。秦漢而下。本搖末蕩。樹奢媒以廣君欲。開利塗以窮民力。雲錦霧縠之巧。歲變霜縞冰紈之名。日出親桑之禮。頽於上。災身之服。流於下。倡人嬖妾。被后飾者。以千計。桀民大賈。僭君服者。蓋百數。一室御績。而千屋垂綰。十人漂絮。而萬夫挾纊。雖使蠶被於野。蠶盈於車。朝收暮成。猶不能給。況役少以奉衆。破實而爲華哉。方且規規然重商人衣絲之條。罷齊官貢服之職。衣弋絲

以示儉。襲大練以去華。是猶捧出堙尾閭之深。覆栝救崑崗之烈。波驚風動。誰能禦之。由斯而言。則予之功。非欲厚古而薄今。時之異也。子之織。非欲膏身以侈物。化使然也。二者交壓於道。奚獨怨我哉。且古姜嫄太姒。皆執子之勤。今欲以一己之勞而讓我過矣。於是織婦不能詰。而終身寒云。

楚辭一首

壯觀壯觀。在眞州城北原上。

臨南山。猗陟北帖。撫壯勝。猗遺萬古。漫漫蒼蒼。穹無所。奕奕業業。縱奇度。逶迤猗前征。盤礴猗後駐。奮迅猗奔駛。卻約猗畔顧。環旋猗抱卷。引伸猗就旅。霧釋猗離掩。雲乘猗呼舉。晻晻猗蟾輝。悒悒猗蒸雨。鬱鬱猗陽春。莽莽猗玉露。燦燦猗午停。翳翳猗酉去。傾吾儕猗並與步。卻飛仙猗不遐慕。留其形猗久何苦。便莫使猗遵坦路。適莫適猗破心阻。樂莫樂猗頻會遇。莫莞藤猗擷芳蕀。

寶晉英光集卷第二

古詩上

道林

陟巘不自期。孤雲挂松頂。一揖不相期。飛去無留影。雲已去。泉更長。雲泉畢世友。相得每相忘。

晉陵龍挂行

萬聲齊呼一聲嚇。東望蒼旻兩龍挂。浩浩隨雲百川倒。隱隱雷車千兩駕。疲農望天手加賴。怕歉求豐心惘惘。老龍甲坼血流莽。取水雖多早彌廣。暴狂因慙精誠微。赫赫炎曦一輪榜。

題巨然海野圖

江郊海野坡陀闊。林遠煙疎淡天末。枰分秦町暮潮發。星列漁鄉夜梁活。闢荆大圖矜秀拔。取巧施工不真絕。意全萬象無不括。維摩老筆巨然奪。橋防忽覺來人物。接籬肯更圖牛羯。淵渟浪洑開龍閣。汨入瀟翻下鯨決。桶盤疑是少陵宅。蘆深恐有詹何客。黃塵蔽天歸興結。時向虛齋一開滌。

東坡居士作水陸於金山相招足瘡不能往。作此以寄之。

久陰障奪佳山川。長瀾四溢魚龍淵。衆看李郭渡浮玉。晴風埽出清明天。頗聞妙力開大施。足病不列諸

方仙想應蒼壁有垂露。照水百怪愁寒煙。

明月歌二首

高高疑將夜色卷。八荒更無纖雲屯。冰輪直壓巨鼇首。東海萬里齊崩奔。仰觀左右毛骨竦。徐喘塵煙攝羣動。寥泝初疑玉兔跳。銀潢更恐金波湧。兒童爭指桂枝好。遊人不厭嫦娥老。苦留清景拂疎星。要與羲和接昏曉。光到長門知不知。猶勝關山人未歸。清風着我生雙翼。來作蟾宮變化飛。

姬娥竊藥爲飛仙。夜食丹霞凌紫烟。瞥開銀碧排翠鈿。信手拂掠新粧妍。娥眉點出爭嬋娟。皎然嬌額臨風前。佳人再拜心拳拳。多生端有好因緣。掀雲直指烏號懸。下射萬頃楊花氈。南飛驚鵲殊可憐。北堂人冷空無眠。彩霞欲掣舞衣瑣。水精梳插籠鬢蟬。方諸滴瀝生流泉。老蚌呼吸凝芳鮮。誰家破鏡飛上天。滿林玉玦相勾連。多情應照載花船。無窮解趁春鞭。莫惜自與桂華偏。駒隙誰爭白黑先。斯須幾望擲清圓。白毫宛轉吞大千。纖埃不隔知無邊。蕊宮可掬疑深穿。瓊華隨步翻繡筵。琉璃倒海傾長川。買來曾不用一錢。笙歌醉賞須年年。

菱溪石

長虹潛貫幽巖窟。綠烟更染秋波骨。不容俗眼覩神功。只向菱溪作靈物。少室仙人領一麾。至誠發徧山中奇。雄雌亭亭兩挺出。宛若碧玉含春漪。朱欄碧甃拱山麓。翠霧彤霞掩幽谷。能將膚寸起清泉。幾見峯前春雨足。邇來新飾紫微宮。奇詭搜索林樾空。五色磊磊可補缺。三品往往慙收功。紫衣使者銜天勅。肯

教秘此蒼苔色。菱溪脫迹飛上天。迴看幽谷空雲烟。

僧舍假山

玉峯高愛插天碧。過眼雲關無處覓。纔將呀豁向疎窗。已見峯稜翻瘦脊。明月照出溪中水。清風掃偏巖邊石。懸崖絕磴疑可攀。白霧蒼烟俱咫尺。天陰未徹山陰寒。雨聲欲絕泉聲乾。須知物理有真妄。豈識道眼無殊觀。萬象森嚴掌握內。大塊俯仰毫芒間。抽身更洗清淨足。探歷幽深非所難。山僧作山真有以。詩人吟詩從此始。意教妙手發天慳。戲取神功當衆美。君不見浣花野老深結廬。白鹽赤甲龍虎趨。清吟醉賞左右足。當時應笑秦鞭驅。

智禪草書

人愛老張書已顛。我知醉素心通天。筆峯卷起三峽水。墨色染徧萬壑泉。興來颯颯吼風雨。落紙往往翻雲烟。怒蛟狂虺忽驚走。滿手墨電爭迴旋。人間一日醉夢覺。物外萬態涵無邊。使人壯觀不知已。脫身直恐凌飛仙。葉筆爲山儻無苦。洗墨成池何足數。由來精絕自凝神。不在公孫渾脫舞。

芾頓首今日去國之官謹成拙詩上獻相國汲公鈞席下

百尺青琅玕。浸以萬丈瀾。我欲搥柯梗。一蠶酌知難。屢亦爲世有。豈不詰其端。嵯峨呂汲公。捧日當碧天。簡直抱一氣。代理夫何言。有志隆宋業。無心崇黨偏。透璞辨珉玉。披藁刈蘭蓀。腐儒自束髮。口誦六藝言。治亂甚白著。用舍豈一賢。明時貴知遇。自古遲暮年。敢陳必堯舜。況時值媯軒。豈徒琢空文。文姦龍羣頑。

汨沒俗眼順。妒嫉兒女。謾竊取爲利路。死棄等草菅。朝哦不求和。暮吟不揭竿。不歎歲不與。惟恐枉所存。願披向龜鑑。大叫出肺肝。精誠露皎皎。洞徹金石堅。康濟有次第。沿革自貫穿。刪除救災法。下民不棄田。剔抉經費弊。源源如流泉。思豫近習隙。不紊出納專。正姓以明本。捐賞以運邊。改弊貴無迹。移風常有筌。竊邑飽妻子。封豕所並肩。法令若束薪。不息不敢割。亦不歎折腰。所歎志不宜。時乎恍易失。髮白恨剛情。遲遲竟去國。澆澆臨長川。此志苟不遂。江湖終浩然。

登米老庵呈天啓學士

我居爲江山。亦不爲像法。劫火色相空。未覺眼界乏。屹然留西庵。使我老境愜。衛公精爽在。千古對髮鬢。公來不可作。登臨浩相接。

寄題薛紹彭新收錢氏子敬帖

蕭李騷子弟。不收慰問帖。妙迹固通神。水火土更劫。所存慰問者。班班在箱笈。使惡乃神護。不然無寸札。自此輒畫相。後人眼徒攝。

溪蓮行

廣寒宮女貪遊戲。瑩滑琉璃光照地。嫩雲纔捧出纖腰。無數蛟綃擁嬌翠。仙葩恣逞天姿穠。只愛臨溪梳洗慵。太真豔色禁不得。含羞微笑迎秋風。秋風苦惱秋露泣。的皪珠璣時寫入。紅凝朱粉綠參差。儘褪裙裾煙不濕。初驚王母來瑤池。醺顏更醉流霞卮。三千佳麗已羅列。爭先鸞鑑勻蛾眉。俄見洛神歸洛浦。波

卷轉紋翠蛟舞。羽車雲蓋空紛披。碧疊巫峯生暮雨。坐憐吟倚芸靈香。多情先斷何人腸。不見鴛鴦與鸞。
瀟恣穿薄影眠池塘。

蕭閑堂詩并序

四明從事晉陵錢君世系。字延叟。過襄陽米芾曰。昨送李濟明渡江。與汪行之復會蕭閑堂。已撤
幕。壁間有君像。題曰。權杭州觀察推官米元章像。楊之儀筆。楊之傑贊曰。君子之友。小人之讐。以
人方人。叔度宜儔。余以袖掩字。而問行之曰。誰歟。行之曰。君也。僕爲檢同氣德友識面三編。無二
君名姓。嗚呼。古人論世取友。況同世哉。世復有三君子者。觀文殿學士王公詔。字子純。樞密直學
士劉公庠。字希道。則僕竟不識其面。選人蔡天啓。肇相知中語。僕若素心者。腹云得僕於王荆公。
蓋僕元豐六年赴希道金陵從事之辟。會公謫居。始識公于鐘山。聞公門有數後進。喜爭名而相
非。又記以長者之言也。如天啓樂道人善者。一人而已。僕老矣。不知一蔡二楊行能識面乎。因延
叟之語。發悲歎。并記其事于家集中。以貽子孫。嗚呼。仕開求進之路。則世人之邪說大行。紛紛不
求己而非人。豈其本心。實利之誘然。今樂善君子一何多耶。彼口不道忠信。捷捷而惡人。翩翩而
自喜。默默而懷姦藏慝。竊竊掩人之善。沾沾自標置者。得不少悛乎。既序其事。因系以詩。

誰起蕭閑堂。圖贊凡陋質。昧昧豈我思。有懷斯士吉。吾生終不遇。二陵已相失。苟養走四方。公卿更絕迹。
向我交漸稀。背憎十六七。豐吾九畹蘭。任汝滿林棘。我豈蕭閑人。偶然得空壁。美哉何方彥。精絕入妙筆。

君不愧顧長康。取媚桓溫圖九錫。我不愧孟浩然。緩策京山遇摩詰。前此交道久不康。紛紛白頭多不卒。嗚呼紛紛白頭多不卒。回首此君應辟易。

發潤州

氣就蚍蜉須角。睽通豕負塗。解衣同俗裸。酌水合狂夫。探社新銘禹。經韶舊弔虞。據鞍休示壯。寡要悔爲儒。爲弔忠遊楚。因崇讓過吳。要離葬終近。嚴子釣行須。御宴妻知辱。散膺客自愚。誠脩日難掩。醢在鼎還趨。和寡方聲越。知稀覺道腴。命齊都將相。義拙落江湖。南夢應隨鴈。西風卻背鱸。弓旌今正歇。多少定同無。

寶晉英光集卷第三

古詩下

自漣漪寄薛郎中紹彭

老來書興獨未忘。頗得薛老同徜徉。天下有識誰鑒定。龍宮無術療膏肓。淮風吹几稀。謾牒典客閉閣閑。壺漿吟樹對山風景聚。墨池濯硯龜魚藏。珠臺寶氣每貫月。月觀桂實時飄香。銀淮燭天限織女。煙海括地生靈光。僞兒乃是翰墨侶。挾竹不使與衛將。象管鈿軸映瑞錦。玉麟葉几鋪雲肪。依依煙華動勃鬱。矯矯龍蛇起混茫。持此以爲風月伴。四時之樂渠未央。部刺不糾翰墨病。聖恩養在林泉鄉。風沙漲天烏帽客。胡不束來從此荒。歐怪褚妍不自持。猶能半蹈古人規。公權醜怪惡札祖。從茲古法蕩無遺。張顛與柳頗同罪。鼓吹俗子起亂離。懷素獷獠小解事。僅趨平淡如盲醫。可憐智永研空白。去本一步呈千嗤。已矣此生爲此困。有口能談手不隨。誰云心存乃筆到。天公自是秘精微。二王之前有高古。有志欲購無高貲。慙慙分貽薛紹彭。散金購取重跋題。

余嘗矚越竹光滑如金版在油拳上短截作軸入笈番覆一日數十張學書作詩寄劉薛

越筠萬杵如金版。安用杭油與池繭。高壓巴郡烏絲欄。平欺澤國清華練。老無他物適心目。天使殘年同